



Nouvas scuvertas a Müstair

Archeologs ed impraisa da vias lavuran parallelmaing

DA FLURIN ANDRY/FMR

■ **Cun preparar il proget pel sviamaint da Müstair vaivan ils respunsabels fat quint chi pudess dar in stretta vicinanza da la clostra scuvertas archeologicas. Quai es uossa eir stat il cas.** Actualmaing lascha fabricar il chantun Grischun sco patrun d'fabrica a Müstair ün sviamaint. «Intant amo passa la via chantunala tras cumün, davo maina ella il trafic suot Müstair oura», declera *Rico Lamprecht* chi presidiescha il cumün da Val Müstair. Pro la clostra Son Jon sbocca quista Via Prävis illa via existenta chi maina lung ils mürs da la clostra oura vers il cunfin cul Tirol dal süd. «Previs d'eira da finir quist sviamaint vers la mità da lügl, sco supponü s'haja uossa però chattà in vicinanza da la clostra fragmains da temps vegls, perquai gnarà il proget retardà ün pa», infuorma'l. Lamprecht nu plondscha però: «Pel trafic tras cumün füssa bainschi il meglder cha'l proget pudess gnir conclus bainbod, pella clostra significhan quists chats però ch'ella dvainta amo plü attractiva ed attira ad amo daplüs interessats a l'istorgia.»

Ün chanal d'aua, fossas e müraglia

Dürant ot eivnas lavuran a Müstair sper ils impiegats da l'impraisa da fabrica chi fan la via eir amo collavuratuors dal Servezzan archeologic grischun. Il ma-

nader dals s-chavamaints es l'archeolog *Christoph Baur*: «I's supponiva fingià daspö plü lönch cha'l mür vers la via chantunala saja plü giuven, cha'l mür oriund d'eira plü inoura, vers süd.» Cur chi'd es gnü fabrichà il vial süd da la via han ils archeologs examinà e documentà tuot quai chi'd es gnü oura: «Pro l'entrada i'l museum clostral e la chapella carolingica vaina chattà ün chanal d'aua sco drenascha da quel temp», disch Baur, «plü inoura, in vicinanza dal sunteri, vaina scuvert i'l profil da la via ün o duos foss cun ossa umana, no supponin perquai chi's tratta da fossas eir da temp carolingic. In nos cas significha quai l'ultim quart da l'ottavel tschientiner.» Implü hana chattà almain trais mürs in direenziun nord-süd chi sun eir gnüts tagliats cun far la via. «E là ingio cha'l sunteri es a fin vaina chattà restanzas d'ün mür plü lung chi pudess propcha esser stat il mür plü vegl dal sunteri.»

Tuot vain documentà acribicamaing

«Pro nossa lavur qua a Müstair nu's tratta d'ün stop da fabrica, sco chi vain dit minchatant», manzuna Baur, «no nu lain impedir il sviamaint da Müstair, no eschan qua per documentar tuot quai chi's chatta avant co suogliar tuot darcheu e finir quista via.» Ils archeologs masüran, fotografeschan e descrivan

tuot las scuvertas. Quai vain lura archiva ed eir publichà in fuorma d'ün rapport e'ls chats vegnan miss in salv. «Quist'eivna pudarana dar liber il sector sura pro l'entrada dal museum, lura pon ils lavuraints cuntinuar lur lavur vi da la via.»

Chats forsa dafatta da temps romans

Patrick Cassiti, il manader scientific da la fundaziun Pro Clostra Son Jon, es stat surprais cha la fundamainta da la via d'eira be ün mez meter profunda: «Lura vain fingià la terra veglia.» El accentuescha chi saja pussibel cha las scuvertas actualas sajan amo plü veglias co dal temp carolingic. Ch'üna part dals chats saja forsa dal temp roman, manaja'l, «da quels stizis d'avant var 2000 ons s'haja chattà eir illa clostra svesa.» Scha quai füss il cas güdessan, sco ch'el disch, quistas scuvertas ad incleger plü bain l'istorgia da la clostra ed eir quella dal cumün. Lavuors da fabrica in vicinanza da la clostra haja dat eir i'ls ons 1980 cur chi d'eira gnü fabrichà il parkegi e suotaint ün grond schler da proteenziun. «In quels ons nu s'haja guardà schi's chattess stizis da temps plü vegls», as regorda *Jürg Goll*, l'anteriur manader da gestiun da la Pro Clostra Son Jon, «quella jada nu d'eira il Servezzan archeologic grischun integrà in quistas lavuors.»



Lavuraints ed archeologs lavuran ün sper l'oter i'l vial süd da la via lung la clostra.

FOTO SERVEZZAN ARCHEOLOGIC GRISCHUN